


Frwing, W.:

Pilagrímur ástar-
innar.

Xmbr. 1860.







PÍLAGRÍMUR ÁSTARINNAR.

EDA

SAGAN AF AHMED AL KAMEL.

EPTIR W. IRWING.

KAUPMANNAHÖFN.

ÚTGEFANDI PÁLL SVEINSSON.

PRENTAÐ HJÁ I. COHEN.

1860



69568

Einusinni var serkneskur konungur í Granada, sem átti einkason, að nafni Ahmed; kölluðu hirðmenn hans sveininn að auknafni al Kamel, eða hinn fullkomna, af því þeir þóktust sjá á honum ljós merki þess, að hann mundi verða afbragð annara manna. Þessu voru og stjórnuspámennirnir samdóma og spáðu þeir því, að hann mundi verða hinn algjörvasti og hamíngjusamasti konungur. Samt vofði eitt ský yfir forlögum hans og sló þó á það rósfögurum lit. Það lá fyrir honum, að verða ástamaður mikill og rata í háskasemdir útaf því. En sú var bót í máli, að yrði öllum ginníngum ástarinnar bægt frá honum þángað til hann yrði fulltíða, þá átti hann hina sælustu og rósömustu æfi fyrir höndum.

Til þess að koma í veg fyrir hættur þessar, réði konungur það af, að uppala son sinn á afskekktum og einslegum stað, þarsem hann aldrei sæji kvennmann eða heyrði ástir nefndar á nafn. Lét hann því gera skrautlega höll á kletta-brúninni fyrir ofan Alhambra, innanum inndæla aldinreiti, og lykja háum múrum á alla vega; sú höll heitir nú Generalife. Var kóngsson lokaður inni í höll þessari og falinn fræðslu og gæzlu Ebens Bónabbens, sem var allra arabískra spekinga fjölfróðastur og óskemmtilegastur; hafði hann dvalið lengstum æfi sinnar á Egyptalandi og lagt þar stund á helgiskurðar letur; hafði hann og leitað innan um legstaði og pyramída og mundi honum þykja egypzk múmía fegri

en hin fríðasta ýngismey. Var vitríngnum skipað að kenna kóngssyni allskonar fróðleik, en eitt var þó undanskilið, því hann skyldi sjá svo um, að hann ekkert fengi að vita um ástina. „Gæt þú hvernar varúðar, sem þér þykir við eiga,“ mælti konungur, „en minnstu þess Eben Bónabben! að ef sonur minn nemur nokkuð af hinni forboðnu fræði, meðan hann er undir þinni umsjón, þá varðar það lífi þínu.“ Þegar Eben Bónabben heyrði orð þessi, brá kuldalegu brosi yfir hinn þurlega svip hans; „verið þér,“ mælti hann, „eins óhræddur um son yðar, einsog eg er um höfuð mitt. Er nokkur von til þess, að eg kenni slíkan hégóma?“

Heimspekíngurinn hafði nú vandlega gætur á kóngssyni, og óx hann og dafnaði þar í höllinni. Tveir svartir þrælur voru til að þjóna honum, og báðir mállausir; þekktu þeir ekkert til ásta, enda hefðu þeir ekki getað lýst kunnáttu sinni fyrir kóngssyni, þó þeim hefði verið veitt hún. Lagði Eben Bónabben alla stund á að mennta hann og leitaðist við að kenna honum hin dularfullu egyptzku fræði, en í þeim varð kóngssyni litilla framfara auðið og sást það fljótt, að hann var með öllu óhæfur til heimspekilegra iðkana.

Annars var hann af úngum kóngssyni að vera, furðanlega eptirlátur og fús á að hlýða öllum áminningum, og fór hann jafnan að ráðum kennara síns. Hann stríddi við sig að geispa ekki undir hinum laungu og lærdómsríku kenníngum Eben Bónabbens; nam hann af honum margskonar fróðleik, þó ekki yrði hann djúplærður í neinu, og náði hann farsællega tuttugasta árinu; var hann þá furðuverk konúnglegrar speki, en með öllu ófróður um ástina.

En um þetta leyti sást samt nýbreytni nokkur á háttum hans. Hann hætti alveg við lærdómsverk sín og fór að reika um aldingarðana og sitja hjá gosbrunnunum einsog í leiðslu. Honum hafði meðal annars verið kennt dálítið til

hljóðfæra listar, og varði hann mestöllum tíma sínum til að iðka hana. Spekingurinn Eben Bónabben varð undireins áhyggjufullur og reyndi til að útrýma þessum hégóma grillum með bókstafareikningi, — en kóngssonur færðist undan með andstygd. „Eg hata bókstafareikning,“ sagði hann, „eg hef hina mestu óbeit á honum; eg þarf einhvers, sem betur talar til hjartans.“

Vitríngurinn Eben Bónabben hristi höfuðið, er hann heyrdi kóngsson mæla svo. „Nú er útséð um heimspekina,“ hugsaði hann með sér. „Kóngsson veit nú, að hann á hjarta í brjósti sér.“ — Hann hafði vandlega gætur á lærisveini sínum, og sá hann, að hin leynda ástarblíða hans var vakin og vantaði aðeins eitthvað, er ást hans gæti komið niður á. Hann ráfaði um lystigarðana frá sér numinn af gedshræringum, er hann eigi gat gert sjálfum sér grein fyrir. Stundum sat hann hugfánginn, einsog hann væri að dreyma; tók hann þá fiðlu sína og náði hinum hjartnæmstu hljóðum úr strengjum hennar, þvínæst fleygði hann henni frá sér og andvarpaði ótt og titt.

Þetta elskuríka hugarfar fór nú að hneigjast að dauðum hlutum; hann átti sér blóm, sem hann unni öðrum fremur og rækti þau með ástrikri alúð; þvínæst fór hann að leggja ást á ýms tré og var þar einkum eitt fagurvaxið með drúpandi laufum og limum; að því var hann mjög elskur, hengdi hann blómhringa á greinar þess, saung kvæði því til lofs og lék undir með fiðlu sinni.

Vitríngurinn Eben Bónabben varð hugsjúkur útaf þessum skapbrigðum lærisveins síns. Hann sá að það var komið á fremstu nöfna, að hann kæmist að hinni forboðnu kunnáttu og gæti hið minnzta atvik orðið til þess. Varð hann því hræddur bæði um kóngsson og sjálfan sig og vatt bráðan bug að því, að slita kóngsson frá freistingum þeim,

er í aldingarðinum voru og lokaði hann inni í hæzta turni hallarinnar. Þar voru fögur herbergi og víðsýni mikið, og mændi turninn hátt yfir alla blómreitina og hina töfrandi lundi, sem höfðu svo mikil áhrif á hjarta Ahmeds.

En hvað skyldi nú gera til að sætta hann við varðhald þetta og hafa af honum leiðindin? hann hafði numið allan þann fróðleik, sem skemmtun gat verið að, og bókstafareikning tjáði ekki að nefna á nafn. Það vildi til allrar hamingju að Eben Bónabben hafði á Egyptalandi numið fuglamál af Rabbina nokkrum frá Gyðingalandi; hafði það gengið til hans niður í ættir frá Salómoni hinum spaka, en hann hafði numið það af drottningunni frá Shebu. Kóngsson brást glaður við, er hann heyrði um þessa námsgrein talað og stundaði hann hana með slíku kappi, að hann varð fljótt jafnsnjallur meistara sínum.

Nú var turninn honum ekki leingur neinn einverustaður, því nú hafði hann nóga lagsbræður til viðtals. Hinn fyrsti kunníngi hans var fálki, sem hafði hreiðrað sig í glufu einni í turninum og flaug hann þaðan í allar áttir til að leita sér bráðar. Kóngssyni varð hauginn lítt að skapi. Hann var ekki annað en víkingur, mikill í munni og raupsamur, og talaði aldrei nema um stríð og styrjöld og hin stórkostlegustu hervirki.

Þarnaest kynntist hann uglu; það var fjarska spekíngslegur fugl, geysi höfuðstór með starandi glirnur; sat hún allan daginn í veggjarholu einni og var að ránghvolfi í sér augunum, en um nætur flaug hún út. Hún þóktist vera stórvitur, talaði um stjörnufræði og túnglið og lézt vera fjölkunnug; var hún og mjög hneigð til yfirnáttúrlegra vísinda og þókli kóngssyni enn leiðinlegra að heyra á hana en Eben Bónabben.

Þá var þar og leðurblaðka ein, sem liðlángan daginn

var að flökta úti skúmaskoti í hvelfingu einni, en flaug jafnan út í ljósaskiptunum og sletti vængjunum. Hún hafði óljósar hugmyndir um alla hluti, hæddist að því, sem hún þó valla hafði séð og var sem hún ekki hefði gaman af neinu.

Auk þessara þriggja var svala ein, sem kóngssyni gætt vel að í fyrstu. Hún var tölug, en hafði aldrei eirð á sér, mesti málskaps fugl og var á sífeldu flökli. Hún kunni ekkert meira enn til háls og fór á hundavæði yfir allt, en þóktist samt vita allt út í hörgul, þó hún vissi ekkert til hlítar.

Þetta voru nú allir þeir vinafuglar, sem kóngssyni gæfist kostur á að tala við túngumál það, er hann var nýbúinn að nema; turninn var hærri en svo, að aðrir fuglar kæmu þangað að jafnaði. Varð kóngsson fljótt leiður á þessum hinum nýju kunningjum sem hvorki töluðu hyggilega né hjartnæmilega, og fór hann smámsaman að gerast einrænn einsog fyrri.

Leið svo veturinn, en vorið fór í hönd, blómlegt, gróður-sælt og fullt af ángandi sætleik, byrjaði þá og hinn ununarsæli tími, er fuglar breiðra sig og unnast. — Þá hófst allt í einu sætur fuglasaungur með hljóðfögnum klið í lundum og lystigörðum hallarinnar, og barst hljómurinn upp til kóngssonar þangað sem hann sat einmana í turninum. Heyrði hann kveðið í öllum áttum hið sama: ást—ást—ást, súngið og endarsúngið með fjölbreyttum hljóðum og röddum; hlýddi kóngsson þegjandi á saunginn einsog í leiðslu. „Hvað er þessi ást?“ hugsaði hann með sér, „Það er einsog hún uppfylli allan heiminn og þó þekki eg ekkert til hennar.“ — Leitaði hann því til fálkans, kunníngja síns, til þess að verða þess visari. En vígafuglinn svaraði honum með fyrirlitningu: „Þú verður að fara niður á jörðina og spyrja

hina friðsömu alþýðu fugla, sem eru skapaðir til að verða okkur loptkonungunum að bráð. Hernaður er mitt starf og hef eg yndi af bardögum. Er þar stult af að segja, eg er vígafugl og þekki ekkert til þess, sem kallað er ást.

Kóngsson gekk burt frá honum með andstygd og fór til uglunnar, þarsem hún kúrði ein sér. „Uglan er spektarflugl,“ hugsaði hann með sér, „og má vera, að hún geti leyst úr spurningu minni.“ Beiddi hann þá ugluna að segja sér, hvað þessi ást væri, sem allir fuglarnir í lystiskógunum væru að kveða um.

Þá setti uglan á sig svip, svo að sjá mátti, að henni þókti tign sinni misboðið. „Nóttunum ver eg til bóknáms og ransókna,“ mælti hún „en á daginn sit eg í holu miðni og grufla úti það, sem eg hef lært. Hvað saungfluglana snertir, sem þú minnst á, þá virði eg þá þess aldrei að hlýða á þá — eg fyrirlít þá og yrkisefni þeirra. Guði sé lof, að eg ekki kann að sýngja; eg er heimspekingur og þekki ekkert til þessarar svonefndu ástar.“

Nú gekk kóngsson til hvelfingarinnar, þarsem leðurblaðkan hékk á löppunum, og bar sömu spurninguna upp fyrir hana. Leðurblaðkan fitjaði með ólundarsvip upp á nefið og mælti öfluglega: „Því ertu að gleppja morgunsvefn minn með slikri hégóma spurningu?“ Eg flýg aldrei út nema í rökrinu, þegar allir fuglar sofa og skipti eg mér aldrei af þeirra högum. Eg er hvorki fugl né dýr og þakka eg guði fyrir. Eg hef komið að illsku þeirra allra og ber eg því hatur til þeirra; í stultu máli, eg er mannhatari og þekki ekkert til þessarar svonefndu ástar.“

Nú leitaði kóngsson til svölunnar, því ekki var á öðru völ, og kallaði til hennar í því hún var að kringsólást um efstu brúnina á turninum. Var þá ákaflega mikill asi á svölunni einsog vant var og gaf hún sér valla tíma til að

svara. „Eg segi þér það satt,“ mælti hún, „eg hef svo mörg opinber störf að annast og á í svo mörg horn að líta, að eg hef engan tíma til að hugsa um þesskonar efni. Eg þarf að vitja ótal staða á degi hverjum og grennzlast eptir ótal mál-efnum svo eg hef ekki svo mikið sem augabragðs tóm til þessara hégómlegu smámuna. Svo eg ekki eyði mörgum orðum, þá er eg heimsborgari og þekki ekkert til hinnar svonefndu ástar.“ Að svo mæltu þaut svalan niður í dalinn og hvarf samstundis úr auglýn.

Kóngsson sat eptir hálfringlaður og þókti von sín hafa illa brugðizt, en forvitni hans örfaðist því meira, sem örðugra reyndist að fullnægja henni. Meðan hann sat þarna í þúngu skapi, kom öldúngurinn fóstri hans í turninn. Kóngsson hljóp á móti honum með asa. „Spakvitri Eben Bónabben!“ mælti hann, „þú hefir kennt mér mikið af vizku þessa heims; en eitt er þó, sem eg er með öllu ófróður um og þess vildi eg verða vísari.“

„Kóngsson“, svaraði Eben Bónabben, „þarf ekki annað en að bera upp spurnínguna, og allt, sem er fyrir innan það svið, sem markað er þekkíngu minni, skal vera honum til reiðu.“

„Seg mér,“ mælti Ahmed, „þú, sem ert allra spekinga djúpvitrastur, hverrar náttúru er sá hlutur, sem nefnist ást?“

Þá var einsog Eben Bónabben væri lostinn reidarslagi, svo brá honum við. Hann skalf og bliknaði upp í framan og þókti honum, sem höfuðið sæti laust á milli axla sér.

„Hvernig gat þér kóngsson minn!“ mælti hann, „komið til hugar að spyrja að þessu, hvar hefir þú numið slíkt hégóma orð?“

Kóngsson leiddi hann útað turnglugganum. „Hlustaðu á Eben Bónabben!“ mælti hann. Spekingurinn hlustaði. Næturgalinn sat í þéttum runni fyrir neðan turninn og

gól mansaunga til rósarinnar, unnustu sinnar; hljómaði fagur saungur frá hverjum blómkvisti og hverjum skógar lundi og ást—ást—ást var hið óbreytta kvæðisefni.

„Mikill er drottinn!“ mælti spekingurinn Bónabben. „Hver mundi treysta sér til að dylja leyndardóm þenna fyrir mannlegu hjarta, þegar jafnvel fuglar himinsins taka sig saman um að koma honum upp?“

Að svo mæltu vikur hann sér að Ahmed og segir: „Kóngsson minn! lokaðu eyrum þínum fyrir þessum tælandi saung. Lokaðu hugskoti þínu fyrir þessari háskalegu þekkingu. Vita skaltu, að ást þessi ollir helfingi þeirra hörmunga, sem kvelja dauðlega menn. Hún veldur dylgjum og fjandskap milli bræðra og vina, og hljótask af launvíg og róstusamir bardagar. Henni fylgja áhyggjur og harmar, daprir dagar og svefnlausar nætur. Hún kemur kyrkingi í blóma æskunnar og spillir gleði hennar; hún veldur harmi og meinsemdum ótímabærrar elli. Guð láti þig, kóngsson minn! vera með öllu ófróðan um það, sem kallað er ást“.

Vitríngurinn Eben Bónabben gekk á burt í skyndi, og sat kóngsson eptir þúngt hugsandi útaf þessu. — Hann leitaðist við að útrýma því úr hjarta sínu, en það kom fyrir ekki, því það varð jafnan efzt á baugi í huga hans og kvaldi hann og þreytti sig á árángurslausum getgátum. En er hann hlustaði á hinn hljódfagra fuglaklið, þá hugsaði hann með sér: Sannlega eru raddir þessar lausar við alla sorg; þær eru ekki annað en ást og gleði. Sé ástin undirrót slíkrar eymdar og illinda, því hnípa þá ekki fuglar þessir einmana eða rífa hver annan í sundur, í stao þess að þeir flöggra fagnandi kríngum skógana eða skemmta sér innanum blómin?

Einn morgun lá hann í rúmi sínu og var að hugsa um þessa óskiljanlegu ráðgátu. Herbergis glugginn stóð opinn

fyrir morgun andvaranum, sem kom neðan úr Darró dalnum, þúngaður af ángan gulleplis blómannna. Kliður næturgalans heyrðist á lengdar og kvað hann um sama efni og vant var. Hlustaði kóngsson á það andvarpandi, en í sama bili heyrðist vængja þytur í lopti; fögur dúfa, sem flýði undan fálka, sendist inn um gluggann og féll niður á gólfid með öndina í hálsinum, en ránsfuglinn, sem missti bráðar sinnar, flaug upp til fjallanna.

Kóngsson tók upp dúfuna, sem stóð á öndinni, strauk á henni fiðrið og hélt henni uppað brjósti sér. En er hann hafði gert hana spaka með bliðlæti sínu, lét hann hana inni gullbúr og bauð henni hið hvítasta og smærsta hveili og tærasta vatn. En hún hafnaði sæðunni og sat hnípin og drúpanði og klakaði aumkvunarlega.

„Hvað gengur að þér?“ mælti Ahmed. „Er þér ekki allt veitt, sem hjarta þitt getur óskað?“

„Æ, nei!“ ansaði dúfan, „er eg ekki skilin frá unnustu minni og það um blessaðan vortímann, sem er árstíð ástarinnar.“

„Ástarinnar!“ segir Ahmed, „kæri fugl minn! getur þú sagt mér, hvað ást er?“

„Það get eg kóngsson minn!“ svaraði dúfan, „og það hardla vel. Hún er ángur, ef einn er, sæla, ef tveir eru, þræta og fjandskapur, ef þrír eru. Hún er það töfraafl, sem laðar tvær verur saman og samtengir þær með ljúfu samlyndi, svo að þeim þykir sætt að vera saman, en sárt að skilja. Er engin sú vera, sem hafi dregið þig til sín með þessum böndum hinnar blíðu ástar?“

Þá svaraði kóngsson: „Mér þykir vænna um hann Eben Bónabben en nokkuð annað, sem til er; en opt er hann leiðinlegur og stundum þykist eg sælli, þegar hann er ekki hjá mér.“

„Eg tala ekki um þesskonar samlyndi“, mælti dúfan, „eg tala um ástina, megin afl og leyndardóm lífsins, hinn

töfrandi draum æskunnar og hina rósömu gleði ellinnar. Líttu út kóngsson minn! og sjáðu hvað öll náttúran er full af ástinni á þessari blessuðu árstíð! Hver sköpuð skepna á sér maka; hinn minnzti fugl kveður fyrir unnustu sinni, skorkvikindin í duptinu unnast og fiðrildin, sem þú sér flökta hált í kríngum turninn og leika sjer í loptinu, þau njóta sælu hvert af annars ást. Æ! kóngsson! hefirðu lifað svo marga daga hinnar dýrmætu æsku þinnar, og þekkir ekkert til ástarinnar? Er engin kvennkyns vera, fögur kóngsdóttir eða önnur tigin mey, er fangið hafi hjarta þitt og fyllt það sárljúfri órósemi og sætri laungun?“

„Nú fer eg betur að skilja,“ mælti kóngsson andvarpandi, „eg hef optar enn einusinni kennt slíkrar óróar, þó ekki vissi eg af hverju hún væri sprottin; en hvar ætti eg að leita að slíkri unnustu, sem þú lýsir, í þessari hryggilegu einveru?“

Nú töluðu þau þetta nokkru leingur og lauk svo hinni fyrstu tilsögn, er kóngssyni var veitt í ástarefnum.

„Æ!“ sagði hann, „sé ástin í raun og veru slík unun og valdi missir hennar slíkum harmi, þá varðveiti drottinn mig frá því, að spilla gleði nokkurs þess, sem helgar sig henni.“ Að svo mæltu lauk hann upp búrinu og tók dúfuna út úr því, kyssti hana síðan blíðlega og bar hana út að glugganum. „Fljúg þú láns fugl!“ mælti hann, „njóttu fagnaðar með unnustu þinni í æskunni og vorblíðunni. Því skyldi eg láta þig verða lagsbróður minn í fángelsi mínu hér í þessum eyðilega turni, þar sem ástinni er úthýst?“

Dúfan baðaði út vængjunum af fögnunni og leið burt á þjótandi vængjum ofan að hinum blómlegu lundum í Darró dalnum.

Kóngsson horfði á eptir henni svo langt sem augað eygði, en þvínæst lét hann bugast af sáru hugarángri.

Kliður saungfuglanna, sem áður hafði skemmt honum, varð nú ekki til annars en að auka á hrygð hans. Þeir kváðu án afláts um ástina og nú skildi hann helzt til vel, hvað þeir sýngu.

Í næsta skipti er hann hitti spekinginn Eben Bónabben, var sem eldur brinni úr augum hans. „Því hefirðu haldið mér í þessari fyrirlitlegu fávísi?“ mælti hann. „Því hefir mér verið meinað að þekkja meginafi og leyndardóm lífsins, sem hið lítillfjörlegasta kvikindi skilur og skynjar? Sjáðu, hversu öll náttúran er frá sér numin af fögnuði! Hver sköpuð skepna á sér maka. Þetta er ástin, sem eg hef leit- að vitneskju um. Því er mér einum fyrirmunad sælu hennar? Því hefir svo mikill tími æsku minnar verið látinn fara til ónýtis, án þess eg væri fræddur um, hvílíkan fögnuð hún veitir?“

Spekingurinn Bónabben sá nú, að ekki var til neins að leyna nokkru úr því svo var komið, að kóngssonur var búinn að nema hina háskalegu forboðnu fræði. Sagði hann honum því, hvað stjörnuþámenirnir hefðu sagt fyrir og hvernar varúðar hefði gætt verið við uppeldi hans til að afstýra hættum þeim, er yfir vofðu. „Og er nú líf mitt á þínu valdi, kóngsson minn!“ mælti hann. „Því ef þú lætur konúnginn föður þinn komast að því, að þú hafir fræðzt um ástríðu ástarinnar, meðan þú varst undir minni gæzlu, þá verður það minn bani.“

Kóngsson var eptirlátur einsog flestir únglingar á hans reki og hlýddi hann ljúflega á fortölur læriföður síns. Þarhjá var hann Bónabben hollur í huga og með því hann enn sem komið var aðeins þekkti ástina að sögn, en ekki raun, þá einsetti hann sér að geyma það, er hann vissi í sínu eigin brjósti, heldur enn að stofna lífi vitríngsins í háska.

En það lá nú fyrir honum, að þagmælsku hans skyldi

verða freistað svo meira mark væri að. Nokkrum dögum síðar sat hann einn morgun á tindum turnsins þungt hugsandi; þá kom dúfan fljúgandi, sem hann hafði sleppt lausri, og settist óhrædd á öxl honum

Kóngsson tók hana, hélt henni blíðlega upp að hjarta sínu og mælti: „Sæ! ert þú fugl! sem flogið getur, einsog á vængjum morgunroðans til endimarka jarðarinnar. Hvar hefirðu verið síðan við skildum?“

„Í fjarlægum landi, kóngsson minn!“ svaraði dúfan, „og færi eg þér nú fréttir til að launa þér frelsisgjöfina. — Eg er vön að fljúga um láð og lög, yfir fjöll og sléttlendi, og svo bar til, er eg leið í loptinu, að eg sá fyrir neðan mig inndælan lystigarð með allskonar aldinum og blómum. Stóð hann á grænu engi fram með veltandi vatnsfalli, en í honum miðjum gnæfði glæsileg höll. Tyllti eg mér niður í lundi einum til að hvíla mig, því eg var móð af fluginu. Þar fyrir neðan mig sat úng kóngsdóttir á grænum grasbekk, í blóma og fegurð æsku sinnar. Umhverfis hana sátu þjónustumeyjar hennar, allar úngar að aldri einsog hún sjálf, og hlóðu þær á hana rósakerfum og blómhringum; — en ekkert blóm, hvorki þar í garðinum né á víða vangi, mátti við hana jafnast, svo var hún yndisleg ásýndum. En þarna blómgaðist hún í leyni, því háir veggir luktu garðinn á alla vega og var það einskis manns færi, að komast þar yfir. Þegar eg sá þessa fögru mey, svo únga og saklausa og óflekkaða af heiminum, þá hugsaði eg með mér: þarna er sú, sem guð hefir skapað til þess, að tendra elsku í hjarta kóngssonarins míns.“

Þessi lýsing kom hjarta Ahmeds í uppnám, einsog eldi lysti í tundur; nú hafði hann það, er öll hin leynda ástarlaugun hans gat fest sig við og felldi hann óumræðilega elsku til kóngsdótturinnar. Ritadi hann nú hið hjartnæmasta bréf

og lýsti í því hinni brennandi elsku sinni, kvartaði hann og sáran undan ófrelsi því, er fyrirmunaði honum að leita hana upp, svo að hann gæti fleygt sér fram fyrir fætur henni. Bætti hann mansaungsvísu meðan við bréfið, og voru þær kveðnar með blíðri og hjartnæmri orðsnild, því hann var náttúruskáld og hafði ríka andagipt af ástinni. Skrifaði hann þannig utan á bréfið: „Til hinnar ókunnna blómarósar frá bandingjanum Ahmed kóngssyni;“ Þvínæst gerði hann það ilmandi með desdupti og rósablöðum og fékk það dúfunni.

„Far nú á stað“, mælti hann, „þú, sem ert allra sendiboda tryggastur. Fljúgðu yfir fjöll og dali, fljót og grundir; þú mátt hvorki hvíla þig í lundi né tylla fæti þínum á jörð fyrr en þú ert búin að skila bréfinu til hennar, sem hjarta mitt elskar.“

Dúfan renndi sér hátt í lopt upp og flaug burt í beina stefnu. Mændi kóngsson á eptir henni, þangaðtil hún aðeins sást bera við ský nokkurt einsog dökkur depill og hvarf að fjalla baki.

Nú sat hann dag frá degi á gægjum til þess að vita, hvort sendibodi hans ekki kæmi aptur, en hann kom ekki að heldur. Fór hann að gruna dúfuna um gleymsku, en þá var það eitt kvöld um sólarlag, að hún flaug inn í herbergi hans, datt niður fyrir fætur honum og gaf upp öndina. Einhver bogmaður hafði hæft hana með ör í brjóstið, en samt hafði hún streitst við að afljúka erindi sínu, allt frammi dauðann. Laut þá kóngsson hryggur ofanað þessum blíða píslarvotti trygðarinnar og sá hann að perlumen var bundið um hálsinn og áföst við það litil litmynd, sem lá undir vængnum. Það var mynd yndisfagurrar kóngsdóttur í blóma æskunnar. Gat enginn vafi á því verið, að þetta væri blómarósin í lystigarðinum; en hver var hún og hvar í

heimi? Hvernig hafði hún tekið bréfi hans, og sendi hún mynd þessa í þeirri veru, að hún vildi þýðast ástir hans? Það hlaut nú af dauða hinnar trygglyndu dúfu, að allt þetta var óljóst og efasamt.

Kóngsson starði á myndina þángaðtil augu hans fylltust tárur. Hann þrýsti henni að munni sér og hjarta og horfði á hana heilum stundum saman, hugstola af ofurmegni ástarinnar „Fagra mynd!“ mælti hann, „æ þú ert ekki annað en mynd. En samt horfa hin döggskaeru augu þín blíðlega til mín; það er einsog hinar rósfögru varir þínar vilji tala til þess að hughreysta mig. En það er einber hugarburður. Hver veit nema hið sama hafi sýnt einhverjum öðrum biðli, sem orðinn er mér hlutdrjúgari! En hvar í víðri veröld get eg vonast eptir að finna hana, sem myndin er gerð eptir? Hver þekkir þau fjöll og ríki, sem eru á milli okkar beggja, og getur ekki margt óhappið orðið til fyrirstöðu? Nú eru margir biðlar, ef til vill, að flykkjast utanum hana, meðan eg sit hér einsog bandingi í turninum og eyði tímanum með því að tilbiðja skuggamynd þessa.“

Ahmed kóngsson var ekki lengi að taka saman ráð sín. „Eg flý burt úr höll þessari,“ mælti hann, „því hún er orðin mér að hvímléidri myrkvastofu og mun eg leggja á stað einsog pílagrímur ástarinnar til að leita að þessari ókunnugu kóngsdóttur um víða veröld.“

Það hefði nú ekki verið neinn hægðarleikur að sleppa úr höllinni um dagtímann, þegar allir voru á ferli, en um nætur voru litlir sem engir verðir, því engum kom til hugar, að kóngsson mundi taka uppá slíku, þarsem hann jafnan hafði unað vel ófrelsi sínu. En hvernig átti hann að rata veginn á næturflótta sínum, þarsem hann var með öllu ókunnugur í landinu? Hann hugsaði þá til uglunnar, sem var

vön að vera náttförl og hlaut því að þekkja alla vegi. Leitaði hann því til hennar þangað, sem hún kúrði ein sér og spurði, hvort hún væri kunnug í landinu.

Þá setti uglan upp þóttafullan svip og mælti: „Vita skaltu kóngsson, að vér uglurnar erum næsta gamalættaðar og er kyn vort víða niður komið, þó mjög sé því nú aptur farið. Það er valla nokkur vígturn áf jöllum uppi, né kastali á láglendinu eða varnarvirki í borgum, að ekki búi þar einhver bróðir minn, föðurbróðir eða frændi, og þegar eg hef farið orlofsferðir til þessa fjölmenna skyldfólks, hef eg gægt inni hvern krók og kima og kynnt mér alla leynistaði í landi þessu“. Kóngsson varð stórglaður, er hann sá að uglan var svo hundkunnug og sagði henni nú í trúnaði frá ást sinni, og kvaðst ætla sér að strjúka; beiddi hann hana að vera leiðtoga sinn og ráðanaut.

„Ekki nema það!“ sagði uglan með þykkjussvip, „er þess nokkur von, að slíkur fugl sem eg er, fari að bendla sig við ástarmál? Eg, sem helga túnglinu og heimspekinni allan minn tíma!“

„Reiðstu mér ekki, æruverða ugla!“ segir kóngsson; „segðu nú um tíma skilið við heimspekina og túnglið og hjálpaðu mér til að flýja á burt, gerirðu það, skal eg veita þér allt, sem þú getur á kosið.“

„Það er mér nú þegar veitt,“ sagði uglan; „fáeinar mýs eru fullnógur málsverður handa mér, og veggjarhola þessi er fullstór til lærdóms iðkana minna; get eg, sem er heimspekingur óskað mér nokkurs framar?“

„Gættu þess, hávitra ugla!“ mælti kóngsson, „að meðan þú húkir í holu þinni og glápir á túnglið, þá missir heimurinn allra gagnsmuna af gáfum þínum. Einhverntíma verð eg einvaldur konungur og má vera, að eg þá hefji þig til hinnar mestu tignar eg metorða.“

Þó nú uglan væri heimspekingur og hafin yfir hinar vanalegu þarfir lífsins, þá var hún samt ekki hafin yfir met-orðagirndina. Lét hún því loksins til leiðast að strjúka burt með kóngssyni og vera leiðtogi hans og ráðgjafi á pílagrímsferð þeirri, er hann átti fyrir höndum.

Ástfangnir menn eru fljótir til að koma ætlun sinni fram. Kóngsson tindi saman alla dýrgripa sína og stakk þeim á sig, því hann ætlaði þá sér til farareyris. Næstu nótt seig hann niður á linda sínum ofanaf loptsvölum nokkrum á turninum, klifraðist yfir hina ytri múra hallarinnar og náði með leiðsögn uglunnar heilu og höldnu upp á fjöllin, áður en dagur var á lopti.

Nú leitaði hann ráða hjá leiðtoga sínum um það, hvernig haga skyldi ferðinni framvegis.

„Viljir þú fara að mínum ráðum,“ mælti uglan, „þá legg eg það til, að þú haldir til Seville. Vita skaltu, að fyrir mörgum árum síðan fór eg að finna föðurbróður minn, hágöfuga og volduga uglu, sem bjó þar í hrörlegri höll. Um nóttina var eg á flökti yfir borginni og sá eg þá einatt, hvar ljós brann í turni, sem stóð einn sér. Settist eg loksins á turnbrúnina og sá að birtan stóð af lámpa töframanns nokkurs frá Arabalandi; galdrabækurnar lágu kringum hann í hrúgu, en á öxl hans sat einkavinur hans, afgangall hrafns, sem hafði fylgt honum frá Egyptalandi. Eg er kunnug hrafninum og mestallan fróðleik minn á eg honum að þakka. Töframaðurinn er nú dáinn, en hrafnninn býr ennþá í turninum; það er mesta furða, hvað þeir fuglar eru lánglífir. Nú ræð eg þér, kóngsson! til að leita upp hrafnninn, því hann er spáfugl og særingafugl og þartil göldróttur einsog allir hrafnar eru alræmdir fyrir, einkum þeir á Egyptalandi.“

Kóngssyni þókti ráð þetta viturlegt og sneri hann því

undireins á leið til Seville. Gerði hann förunaut sínum það til eptirlætis, að hann fór jafnan náttfari, en á daginn lét hann fyrir berast í einhverjum dimmum helli eða hrundum varðturni, því uglan þekkti öll þesskonar fylgsni og hafði hið mesta yndi af rústum, einsog allir fornfræðingar.

Loksins náðu þau til Seville snemma morguns; uglunni var illa við ysinn og mannferðina á strætunum, lét hún því staðar numið fyrir utan borgarhliðið og fékk sér þar húsnaði innan í holu tré.

Kóngsson gekk nú innum borgarhliðið og veitti honum hægt að finna töfraturninn, sem mændi yfir húsin í borginni einsog pálmatré yfir smáviði á eyðimörk; það var sami turninn, sem stendur enn í dag og ber nafnið Gíralda, eða með öðrum orðum, hinn nafntogaði Serkneski turn í Seville. Gekk kóngsson uppeptir undnu riði, þangaðtil hann kom efzt upp í turninn og hitti hann þar galdrabrafinn; það var afgangall, íbygginn og grákollóttur hrafn með úfið fiður, og ský á öðru auganu, svo að hann var ærið draugslegur ilits. Hann sat á öðrum fæti og hengdi höfuðið ulí aðra hliðina og rýndi með því auganu, sem heilt var, á spámynd eina, sem upp var dregin á gólfinu.

Kóngsson gekk að krumma með lotningu og auðmýkt, sem von var, því fuglinn var hinn æruverðasti ásýndum og gæddur yfirnáttúrlegri vizku. „Fyrirgef mér!“ mælti kóngsson, „þú háaldradi, sjölkunnugi hrafn! Þó eg allrasnöggvast gleppi þig í bókiðnum þínum, sem allur heimur hefir að ágætum. Hér er nú kominn til þín einn, sem hefir helgað sig ástinni, og vill feginn spyrja þig ráða hvernig hann eigi að öðlast það, sem honum leikur hugur á.“

„Með öðrum orðum“ ansaði hrafinn og gerði sig merkilegan á svipinn, „þú vilt reyna, hvort eg kann að lesa í lófa.

Komdu, lofaðu mér að sjá höndina, og láttu mig lesa úr rúnum forlaganna.“

„Fyrirgefðu,“ mælti kóngsson, „eg er ekki kominn til að skygnast inn í leyndardóma forlaganna, sem drottinn hylur sjónum dauðlegra manna; eg er pílagrímur ástarinnar og leitast einungis við að finna leiðarhnoða, svo eg geti náð fundi hennar, sem kom mér til að ráðast í pílagríms gaungu þessa.“

„Og getur kvennmannsleysi amað að þér í Andalúsíu, þarsem er svo gott til kvenna?“ segir hrafninn gamli og gaut til hans hornauga; „þarftu að verða uppnæmur í Seville, þarsem svarteygu stúlkurnar dansa undir hverjum gullapaldri?“

Kóngsson roðnaði við og varð forviðað, er hann heyrði svo léttúðugt tal til gamals fugls, sem stóð með annan fótinn í gröfinni. „Þú mátt trúá mér til þess“, mælti hann í fullri alvöru, „erindi mitt á ekkert skylt við lausúng eða flagarahátt, einsög þú gefur í skyn. Eg skeyti ekki hið minnzta um svarteygu stúlkurnar í Andalúsíu, sem dansa í gullepla skógunum við Guadalquivir. Eg leita yngismeyjar einnar, mér ókunnugrar, en óflekkaðrar, sem mynd þessi er gerð eptir, og bið eg þig, þú völdugi hrafn! að segja mér, hvar eg geti fundið hana, svo framarlega sem speki þín eða íþrótt er þess umkomin.“

Hrafninn grákollótti sneypnist nokkuð við alvörugefni kóngssonarins. „Hvað þekki eg,“ sagði hann þurlega, „til æsku eða fegurðar? Eg vitja þeirra, sem gamlir eru og hrumir, en ekki þeirra, sem eru hraustir og fríðir. Eg er sendifugl forlaganna, eg krúnka dauðaspár uppi á reykháfunum og blaka vængjunum á glugga hins sjúka manns; þú verður að fara til annara en mín, til að leita tíðinda af þessari ókunnugu blómarós þinni.“

„Og hvar á eg að leita,“ mælti kóngsson „nema á meðal vitringanna, sem eru heima í bókum forlaganna? Eg er kónungs sonur, kjörinn af stjórnunum og sendur til að koma fram leyndardómsfullu áformi, sem afdrif heilla ríkja geta verið undir komin.“

Þegar hrafninn heyrði, að málið var svo mikilvægt, að stjórnurnar tóku hlutdeild í því, þá breytti hann bæði málrómi sínum og látbragði og hlýddi með mesta athygli á sögu kóngssonar. En er hann hafði sagt hana til enda, tók hann þannig til máls: „Hvað kóngsdóttur þessa snertir, þá get eg sjálfur ekki frætt þig um hana, því eg flýg ekki innannur aldingarða og lundi júngrúnna; en flýttu þér til Kordófu, og leitað upp pálmatré hins mikla Abderahmans, er stendur í forgarði aðalhofisins. Undir trénu muntu finna þann, sem viðförull er og komið hefir í öll lönd og til allra kónunga og verið dýrðlingur drottninga og kóngsdætra. Hann mun geta frætt þig um það, sem þú leitar að.“

„Haf kærar þakkir fyrir úrlausn þessa!“ ansaði kóngsson. „Lifðu vel, þú lotningarverði særingahrafn!“

„Lifðu vel ástar pílagrímur!“ sagði hrafninn drumslega og sökkti sér aptur niðri spámyndar gruflið.

Kóngsson flýtti sér burt úr borginni, leitaði upp ugluna förunaut sinn, sem hýmdi kyr í tréstofninum, og lagði þvínæst á stað til Kordófu.

Þegar hann var kominn í námunda við borgina, lá leiðin innan um hengigarða, gullapaldra og sítrónu skóga; sá hann þaðan yfir allan Gvadalqvívir dalinn. En er komið var að borgarhliðunum flaug uglan upp í dökkva holu í veggnum, en kóngsson fór leiðar sinnar til að spyrjast fyrir um pálmaviðinn, sem Abderahman hinn mikli hafði gróðursett í fornöld. Stóð hann í miðjum musteris forgarðinum og mændi yfir gullapaldrana og sýpresviðina. Múnkarnir sátu

í krossgaungunum í forgarðinum og voru margir múselmenn að þvo sér við gosbrunnana til hreinsunar, áðuren þeir gengju inn í musterið.

Niðri undir pálmatrénu stóð mikill manngrúi, sem hlýddi á einhvern þann, er virtist hafa hið liprasta tungubragð, að því er heyra mátti. Þetta hugsaði kóngsson, mun vera sá hinn víðförli, sem á að fræða mig um kóngsdótturina ókunu. Hann tróð sér nú inn í mannþraungina, en breint gekk fram af honum, er hann sá, að allur þessi mannsöfnundur var að hlýða á páfagauk; sat hann þar hróðugur með fagurgrænt brjóstfiður og greindarleg augu, kinkaði kollinum án aðáts og var ekki ólíkur fugli, sem er yfirburða ánægður með sjálfan sig. „Hvernig stendur á því?“ segir kóngsson við einn af þeim, sem næst stóðu, „að svo margir ráðsettir menn skuli hafa gaman af bullinu í þessum málóða fugli?“

„Þú veizt ekki, hvern þú talar um,“ sagði hinn, „páfagaukurinn sá arna er kominn af hinum nafntogaða páfagauk á Persalandi, sem orðlagður var fyrir það, hvað vel hann sagði sögur. Allur fróðleikur Austurlanda liggur honum á hraðbergi, og getur hann þulið kvæði utanbókar eins fljótt og hann talar. Hefir hann dvalið í birð með mörgum útlendum konúngum og verið hafður að átrúnadi fyrir lærðóms sakir. Einkum hefir hann verið uppáhald kvennfólksins, því það hefir mestu mætur á lærðum páfagaukum, sem geta vitnað til kvæða.“

„Þá veit eg nóg“, sagði kóngsson. „Eg ætla að tala fáein orð við þenna víðförta merkis fuglundir fjögur augu.“

Náði hann nú að tala við hann einslega og sagði honum erindi sitt. En óðara en hann hafði nefnt það á nafn, setti slíkan ofsahlátur að páfagauknum, að honum vöknaði um augu. „Fyrirgefðu,“ sagði hann „hvað mér varð glatt,

því í hvert sinn sem eg heyri ástina nefnda, get eg ekki að mér gert að hlæja.“

Kóngsson varð blessa á þessu ótímabæra gamni. „Er ekki ástin,“ mælti hann, „hinn mikli leyndardómur náttúrunnar, hið hulda meginall lífsins og allsherjarband samlyndisins?“

„Putt! Putt!“ segir páfagaukurinn og greip frammi fyrir honum, „hvar hefirðu lært þetta blíðskapar hjal? Þú mátt trúa mér til þess, ástin er alveg gengin úr gildi, hennar er nú aldrei getið á meðal gáfadra og menntaðra manna.“

Kóngsson hugsaði þá til þess, hversu ólíkt dúfunni höfðu farizt orð og stundi hann við. Páfagaukur þessi, hugsaði hann með sér, hefir lifað hirðlífi, hann þykist vera findinn og snyrtiherra mikill, en þekkir ekkert til ástarinnar. Vildi hann nú ekki að páfagaukurinn skyldi optar hlæja að ástríðu þeirri, sem var svo rík í hjarta hans og spurði hann því beinlínis að því, er laut að ferð hans.

„Seg mér,“ mælti hann, „þú himn algjörvasti páfagaukur, þú, sem hefir komið í hina leyndustu lundi til friðra kvenna, hefirðu nokkurtíma á ferðum þínum sæð meyna, sem þessi mynd er gerð eftir?“

Páfagaukurinn rétti út klóna og tók við myndinni, kinkaði kollinum til ýmsra hliða og skoðaði hana í krók og kríng. „Það veit trú mín,“ sagði hann, „að það er falleg stúlka, að tarna; ofur falleg, en eg sé svo margar fallegar stúlkur á ferðalagi mínu, að eg get valla — en bitti nú! — drottinn minn! nú þegar eg lít á hana áptur, sé eg að það er hún Aðalgunna kóngsdóttir, hvernig ætli eg að gleyma henni, sem þykir svo undur vænt um mig?“

„Aðalgunna kóngsdóttir!“ segir kóngsson, „og hvar get eg fundið hana?“

„Þey, þey!“ mælti páfagaukurinn, „það er hægra að finna hana en fá. Hún er einkadóttir kristins konungs,

sem ríkir í Tóledó og er hún uppalin einslega og verður höfð í varðhaldi á laun við allan heim, þangaðtil hún verður seytnán vetra, og er þetta gert eptir spásögu stjórnuþámannanna, þessara kumpána, sem sletta sér fram í allt. Þú munt ekki fá að sjá hana; engum dauðlegum manni verður þess auðið. Mér var einusinni hleypt til hennar til að skemmta henni og eg segi þér satt, og til þess máttu trúa páfagauk, sem séð hefir veröldina, — eg hef talað við margar kóngsdætur um dagana, sem einfaldari eru en hún.“

„Nú skal eg segja þér eitt orð í trúnaði páfagaukur minn góður!“ mælti kóngsson, „eg er erfingi að ríki og einhverntíma mun eg sitja á konúngsstól. Eg sé að þú ert hinn fjölbæfasti fugl og þekkir á veröldina. Hjálpaðu mér nú til að fá kóngsdóttur þessa og skal eg þá hefja þig til einhverra mikilla metorða í hirð minni.“

„Það erguðvelkomið,“ ansaði páfagaukurinn; „en láttu embættið verða náðugt, okkur gáfuðu fuglunum er lítið um að vinna.“

Nú bjuggust þeir á stað, og flýtti kóngsson sér frá Kordófu og fór útum sama hliðið, sem hann hafði komið inn um; kallaði hann á ugluna ofan úr veggjarholunni og sýndi henni hinn nýja féлага, sem átti að verða þeim samferða; fóru þau síðan leiðar sinnar.

Ferðin gekk miklu seinna en kóngsson vildi, því hann var hinn bráðlátasti, en páfagaukurinn var vanur höfðingja háttum og var úrillur á morgnana. En uglunni þókti gott að sofa um hádegisbilið og spiltist mikill tími fyrir dagsvefn hennar. Hún hafði og mikinn hug á fornmenjum og tafði það fyrir, því hún vildi jafnan standa við, þar sem rústir voru og ransaka þær, og kunni hún lygasögur um hvern gamlan turn eða kastala í landinu. Kóngsson hafði gert sér í hugarlund að hún og páfagaukurinn mundu

verða hvert öðru til yndis og skemmtunar, úr því hvortlveggi var lærdóms fugl, en aldrei hafði honum verr skjálazt. Þau sátu aldrei á sárshöfði. Páfagaukurinn var findinn og gamansamur, en uglan var heimspekingur. Páfagaukurinn hafði yfir kvæði, sagði álit sitt um nýjar bækur og var fjölórður um vísindalega smámuni; en uglunni þókti allur þesskonar fróðleikur vera einber hegómi og þókti ekki til neins koma, nema yfirnáttúrlegra vísinda. Var það þá opt, að páfagaukurinn kirjaði upp vísur, sagði frá hnittnum svörum og stakk félaga sínum margar sneiðir, hló hann þá fjaraskalega að findni sjálfs sín, en uglunni þókti tign sinni og verðleika hörmulega misboðið með slíku athæfi; varð hún því fyluleg, svipill og bólgin af vonzku og talaði ekki orð mörgum dögum saman.

Kóngsson skeytti alls ekki um væringar félaga sinna, því ástin hélt honum í leiðslu, og horfði hann án afláts á mynd kóngsdótturinnar fögru. Þannig fóru þau nú um hin hrjóstrugu skörð á Sierra Morena, ofan eptir hinu sólbrennda sléttlendi, La Mancha, og Kastiliu, og fram með bökkum hins „gullna Tagusfljóts,“ sem veltur í grænleitum bugðum eptir hálfri Spán og Portúgal. Loksins komu þau auga á rambyggða borg, viggryrða með turnum, stóð hún á klettagjögri, er skagaði út í Tagusfljótið og skall straumurinn á því og klofnaði með beljandi iðukasti.

„Sjáðu,“ mælti uglan, „hina öldnu og alkunnu Tóledóborg, sem nafntoguð er sökum fornmenja sinna. Líttu á þessar lotningarverðu hallir og turna, sem gráir eru af elli, það er einsog einhver sögulegur tignarsvipur sé á þeim; þar hafa margir forfeður mínir setið og grullað.“

„Svei!“ sagði páfagaukurinn og greip fram í, „hvað varðar okkur um fornfræði og lygasögur og forfeðurna þína? Sjáðu heldur það, sem nú er nær hendi, sjáðu heimkynni

æskunnar og fegurðarinnar, sjáðu nú, kóngsson! heimkynni kóngsdótturinnar, sem þú hefir svo lengi eptir leitað.“

Kóngsson horfði þángað sem páfagaukurinn vísaði honum og sá hvar glæsileg höll mændi yfir inndælan aldingarð á skrúðgrænu engi fram með Tagusfljótinu. Samsvaraði það að öllu leyti lýsingu dúfunnar á bústað meyjar þeirrar, er myndin var gerð eptir. Þángað horfði hann og barðist hjarta hans ótt; hann hugsaði með sér: Nú er kóngsdóttirin fagra ef til vill að skemmta sér í þessum skuggasælu lundum, eða hún gengur léttfætt um hjallana fögru þarna, eða hún hvílir sig undir hinu háa hallarþaki. En er hann gætti betur að, sá hann að múrarnir umhverfis aldingarðinn voru geysi háir, svo ekki tjáði að leita á, og voru þeir varðir fjölda vopnaðra manna.

Þá vök kóngsson sér að páfagauknum og mælti: „Þú, sem ert allra fugla ágætastur, þú ert gæddur manns máli. Farðu nú sem fljótast í gærðinn, leitaðu upp meyna, sem eg elska af alhuga og seg henni að Ahmed kóngsson sé kominn einsog pílagramur ástarinnar eptir leiðsögn stjarna-anna til að leita hennar á hinum blómlegu bökkum Tagusfljótsins.“

Páfagaukurinn varð hróðugur, er hann var bedinn sendiferðar þessarar; flaug hann til aldingarðsins og hóf sig upp yfir hina háu múra, flögraði hann nokkra stund yfir runnum og grasreitum, og settist á loptsalir tjaldsalar eins, er skútti fram á fljótið. Skygndist hann þar inn um gluggann og sá hvar kóngsdóttir lá í rúmi sínu og hallaðist upp við dogg; hélt hún á bréfi og einblíndi á það, en tárin hrundu hægt og hægt ofan eptir kinnnum hennar nábleikum.

Páfagaukurinn skók nú vængi sína, lagaði á sér brjóstfiðrið græna og hreykti upp fjaðratoppnum á kollinum, settist þvínæst hjá henni heldur spjátrúngslegur. „Þerraðu

af þér tárin frídasta kóngsdóttir!“ sagði hann og gerði sig hálfklökkann í málrómnunum, „eg er kominn til að hugga hjarta þitt.“

Kóngsdótturinni varð hverft við, er hún heyrði manns rödd, leit hún þá við og sá ekki annað en græntypplan fugl, er stóð frammi fyrir henni með bukti og beygingum. „Æ! hvað ætli þú gelir huggað!“ sagði hún, „þú ert ekki nema páfagaukur.“

Páfagaukurinn stygðist við spurningu þessa og mælti: „Eg hef huggað margar fríðar meyjar um dagana, en sleppum því nú. Að þessu sinni er eg lúngað kominn einsog sendiboði frá kónungs syni. Vita skaltu að Ahmed kóngsson frá Granada er kominn að leita þín og hefir hann nú sett tjöld sín á bökkum Tagusfljótsins.“

Í því kóngsdóttir heyrði þetta, lifnuðu augu hennar og tindruðu skærar en demantarnir í höfuðjásni hennar. „Blessaður vertu á meðal allra páfagauka!“ sagði hún, „miklar gleðifréttir færirðu mér, því eg var lúin og máltvana og þvínær sjúk til dauða, af því eg vissi ekki, hvort Ahmed hafði tryggja og staðfasta ást á mér. Fljúgðu nú sem fljótast til hans aptur og segðu honum, að orðin, sem stóðu í bréfi hans hafi verið grafin á hjarta mitt, og að sál mín hafi lifað og nærzt af ljóðunum hans. En segðu honum, að hann verði samt að sanna ást sína með vopnaburði, því á morgun er hinn seytjándi afmælisdagur minn, og heldur faðir minn þá mikla burtreið; ætla ýmsir kónungasynir að reyna íprótt sína og verð eg gefin þeim, er sigurinn ber úr býtum.“

Páfagaukurinn brá nú vængjum til flugs og flaug aptur þangað, sem kóngsson beið hans. Varð Ahmed frá sér numinn af fögnuði, er hann sá að kóngsdóttirin, sem hann elskaði svo ákaf, var honum holl og trú í huga; þeir menn, sem það lán hefir hlotnast, að dagdraumar þeirra hafa ræzt,

fá getið því nærri, hversu feginn hann varð. En eitt var þó sem dró úr fögnuði hans og það var burtreiðin, sem nú var fyrir höndum. Bakkar Tagusfljótsins glitruðu við af blíki hervopnanna og glumdu af lúðragangi, því fjöldi riddara með friðu föruneysi var á leið til Tóledó og ætluðu þeir að vera við burtreiðina. Sama stjarnan, sem kóngsson var háður, hafði og ráðið forlögum kóngsdóttur. En orðstír segurðar hennar hafði öllu heldur vaxið en rénað fyrir það, að hún var uppfædd á laun. Höfðu ýmsir völdugir konungar og konungasynir beðið hennar, en faðir hennar var kænn og vildi ekki baka sér fjandskap með því að taka einn fram yfir annan og kvað hann því bezt, að þeir gerðu út um mál þetta með vopnum sínum. Voru sumir af biðlum þessum frægir fyrir breysti sína og krapta. Var því illa komið fyrir Ahmed, þarsem hann var vopnlaus og fákænn í öllum riddaraskap.

„Mikill ólánsmaður er eg,“ sagði hann. „að eg skuli hafa verið uppallinn í einsetu og ófrelsi undir gæzlu heim-spekings! hvað stóðar bókstafareikningur og heimspeki, þarsem um ástir er að gera? Eben Bónabben! því varstu svo hirðulaus, að kenna mér ekki að bera vopn?“ Þá brá uglan þögn sinni og hóf ræðu með guðrækilegum inngangi, því hún var hin trúræknasta.

„Allah Akbar! mikill er drottinn!“ mælti hún, „allir leyndardómar eru í hans hendi, hann ræður einn forlögum konunganna. Vita skaltu kóngsson, að land þetta er fullt af huldum dómum, sem dyljast öllum nema þeim, er grafast eptir fróðleik í myrkrunum, einsog eg geri. Vita skaltu, að herna í fjöllum er hellir einn, og í þeim helli er járnborð, og á því borði liggja töfra herklæði, en hjá borðinu stendur hestur í álögum, sem hefir verið þar innibyrður í marga manns aldra.“

Kóngsson undradist mjög, er hann heyrði þetta, en uglan ránghvolfði í sér augunum, reisti upp hornin og mælti enn fremur: „Einhverntíma fyrir mörgum árum síðan kom eg hingað með föður mínum og dvöldum við í hellirnum; komst eg á þann hátt að leyndardómnunum. Sú saga gengur í ætt vorri og heyrði eg afa minn segja hana, þegar eg var dálítill ugluungi, að þessi herklæði hefði átt serkneskur töframadur, er flýði í helli þenna, þegar kristnir menn unnu Tóledó og dó hann þar frá hesti sínum og hervopnum og var það lagt á hvorttveggja, að engin skyldi hafa not af þeim, nema sá, er múselmadur væri og þó ekki nema frá sólaruppkomu til hádegis. En hver, sem neytir þeirra á þeim tíma dags, mun leggja hvern mann að velli, sem hann á vopnaskipti við.“

„Þá þarf ekki meira“ mælti Ahmed, „förum og leitum upp hellirinn!“

Kóngsson fann hellirinn eptir tilsögn uglunnar og var hann á afskekktum stað, þarsem hrjóstrugast var og eyðilegast í klettabeltunum kringum Tóledó; mundi engum hafa tekizt að finna hellismynnið, nema uglu eða fornfræðingi. Inn í hellirnum logaði á grafarlampa og slökknadi aldrei; stóð af honum hátiðleg birta. Á járnborði einu í miðjum hellirnum lágu herklæðin, og var reist upp við það burtstaung; hjá því stóð arabiskur hestur með fullkomnum reidtygjum en ekki breifðist hann heldur en steinn. Herklæðin voru björt og óryðguð og glóði á þau einsog í fornöld; hesturinn var eins bragðlegur og væri hann nýsóktur úr haga, lagði Ahmed hönd sína á makka honum og stampaði hann þá á gólfid og hneggjaði hátt af gleði svo að hellisveggirnir skulfu. Nú hafði kóngsson „hest að ríða og sverð að bregða“ og var fastráðinn í því, að reyna sig til þrautar í burtreiðinni, sem fyrir hendi var.

Nú rann upp burtreiðardagurinn. Var skeiðvöllurinn haslaður með grindum á sléttlendinu fyrir neðan múra Tóledóborgar, sem gnæfa uppi á klettunum, og voru þar uppi reistar svalir og pal'ar handa áhorfendum og breiddir yfir dýrindis dúkar, en silkivoðum tjaldað allt hið efra til hlífðar við sólarhita. Allar hinar fegurstu konur þar í landi voru þar saman komnar uppi á svölunum, en fyrir neðan skálmudu glæsilegir riddarar með fjaðurskreytta hjálma og fylgdu þeim skósveinar þeirra og skjaldsveinar; innanum þá mátti og þekkja hina konúngbornu kappa, sem ætluðu að reyna sig í burtreiðinni.

Þá gekk Aðalgunna kóngsdóttir fram í tjaldstúku konúngs, og svo fagrar sem hinar aðrar konur voru, þá var þó sem myrkva slæji á fegurðarljóma þeirra, þegar hún birtist, einsog upprennandi sól. Urðu menn fángnir af undrun og gerðist málkliður mikill, því allir féllu í stafi, er þeir sáu, hversu hún ljómaði af fegurð og yndisleik, og hinir konúngbornu biðlar hennar, sem aldrei höfðu þekkt friðleik hennar nema að afspurn, fylltust nú hálfu meira hugmóði en áður.

Kóngsdóttirin sjálf var áhyggjufull í yfirbragði; hún gerði ýmist að roðna eða blikna og horfði flóttalega og kvíðvænlega yfir hinn fjaðurskreytta riddaraskara. En er lúðrarnir gullu við til merkis um að hefja skyldi atreiðina, kunngjörði kallarinn, að útlendur riddari væri kominn, og reið Ahmed þá fram á völinn. Hann hafði stálhjálma á höfði, skreyttan gimsteinum, brjósthlífir var upphleypt með gulli; sverð hans og tygilknífur hafði hvorttveggja verið smiðað í Fez og glóðu af dýrustu gimsteinum. Búklara hafði hann á öxl sér, og kesjan, sem hann hélt á, var mögnuð með töfrum. Söðulklæðið á hestinum arabiska var dýrðlega útsaumað og slæddist með jörðinni; drambaði hesturinn fnæsandi undir kóngssyni og hneggjæði af fögnuði, er honum ennþá einu-

sinni gafst að lita herbúnaðinn. Bar kóngsson sig svo hvallega og riddaralega, að hverjum manni varð starsýnt á, en er það varð kunnugt, að hann kallaði sig: „Ástar pílagrím“, fór að koma kvik á kvennfólkið uppi á loptsvölunum.

Þegar Ahmed kom að grindunum, var þeim lokað fyrir honum, og var honum sagt, að engum yrði hleypt inn, nema konúngbornum mönnum. Sagði hann þá nafn sitt og ætterni. Þókti því verr, er það varð uppskátt, að hann var múselmaður, og mátti hann ekki vera í burtreið, þarsem vinna átti til kristinnar kóngsdóttur.

Biðlarnir konúngbornu þyrptust nú í kringum hann með rembilæti og ögruðu honum; einn þeirra, sem var hinn drembilegasti og tröll að vexti, hló að honum fyrir það, hvað hann var grannvaxinn og únglegur og hæddist að nafni því, er hann hafði valið sér. Varð kóngsson þá reiður og bauð hádfuglinum út. Riðu þeir í sundur, sneru við og ridust að. Valt heljarmennið niður úr söðlinum þegar í fyrsta bragði, er burtstaungin kom við hann. Mundi kóngsson hafa látið þar staðar numið, en hér var við seiðtryldan hest og vopn að eiga og gat hann við hvorugt ráðið. Sendist hesturinn inni mannþraungina, þarsem hún var þéttust fyrir og feldi burtstaungin hvað, sem fyrir varð, barst kóngsson svo um völlinn í blindni og varpaði öllum til jarðar, jafnt háum sem lágum, og grömdust honum stórvirki þessi, er hann vann nauðugur. Varð konúngur þá hamslaus útaf óverknaði þessum, er framinn var á þegnum hans og gestum. Sendi hann alla verði sína á stað, en þeir voru feldir úr söðli óðara enn þeir voru komnir á bak. Varpaði konúngur nú af sér skikkjunni, tók skjöld og kesju og reið fram til að ægja útlendingnum með hátign sinni. En konúngurinn fór ekki betri för en hver annar, því hesturinn og burtstaungin fóru ekki í manngreinar álit; geystist

Ahmed nauðugur á móti honum með fjarska ferð og í sama vettfángi sneri hælum konungs í lopt upp, en kórónan valt niðri ríkið.

Í það mund gekk sól í hálegis stað og fengu álögurnar aptur notið sín; renndi þá hesturinn arabiski yfir þveran völlinn, stökk yfir grindurnar og fleygðist út í Tagusfljótið, svam hann yfir strauminn fossandi og bar kóngsson með öndina í hálsinum og utan við sig af undrun til hellisins; nam hann þar staðar hjá járnborðinu og hreifðist ekki úr því heldur en klettur. Fór kóngsson þá af baki harðla feginn, lagði af sér herbúnaðinn og hugðist að biða þess, er forlögin létu að hendi koma. Þvínæst settist hann niður í hellinum og fór að hugleiða, í hvilíkan vanda töfrafákurinn og vopnin höfðu stofnað honum. Nú dirfðist hann ekki framar að láta sjá sig í Tóledó, þarsem hann hafði gert riddurum borgarinnar slíka hneisu og brakið sjálfan konunginn. Hvað mundi kóngsdóttir nú ætla um þessar ósvífnu og róstusömu aðfarir? Var Ahmed næsta kvíðafullur útaf þessu og lét því sendifugla sína fara á stað til að leita fréttu. Páfagaukurinn leitaði til allra opinberra staða, þarsem mannkvæmt var, og kom hann aptur með nóg nýmæli. Sagði hann alla Tóledóborg vera í uppnámi; hefði kóngsdóttir verið borin rænulaus til hallarinnar og öll burtreiðin farið út um þúfur; væri nú ekki um annað talað en hina svíplegu aðkomu serkneska riddarans, hvílík fádæmis hreystiverk hann hefði unnið og hversu kynlega hann hefði horfið á burt. Sumir sögðu hann vera serkneskan galdr-
 amann, en aðrir hugðu hann vera anda, er brugðizt hefði í manns líki; þá voru enn aðrir, er kunnu sögur af tryldum köppum, sem heima ættu í sjallshellrum og ætluðu þeir, að þetta mundi vera einn af því liði og hefði hann snögglega brotizt út úr bæli sínu. En það kom öllum saman um, að

enginn dauðlegur maður hefði getað afkastað slíku, og ríðið svo marga herkæna og harðsnúna kristna riddara af baki.

Uglan flaug út þegar náttadi og var á flökti yfir borginni meðan dimmt var og settist hún niður á húsþök og reykháfa. Flaug hún til konúngshallar einnar, sem gnæfði á hinum klettótta tindi Tóledóborgar og flögraði hingað og þangað um víggarðana og virkisbustirnar, hlæraði hún við hverja smugu, skygndist innum hvern glugga, þarsem ljós var inni, og ránghvolfði í sér augunum; urðu tvær eða þrjár hirðmeyjar svo hræddar, er þær sáu hana, að þær féllu í aungvit. Kom hún ekki heim úr njósnauför þessari fyrr en farið var að elda aptur og roða á fjöllum; sagði hún þá kóngssyni hvað hún hafði séð og mælti: „Þegar eg var að snuðra kríngum einn af hæztu turnunum á höllinni varð mér lítið inn um glugga og sá eg þá fagra kóngsdóttur. Hún lá í rúmi og hallaðist upp við svæfil og stóðu kríngum hana þjónustumenn og lækna, en hún vildi ekki þýðast hjálp þeirra né hjúkum. En er þeir voru farnir út, sá eg að hún tók bréf upp úr barmi sínum, las það og kyssti þvínæst á það hágrátandi, og svo mikill heimspekíngur sem eg er, þá gat eg ekki að því gert, að eg komst við.“

Hjarta Ahmeds brygðist mjög við þessi tíðindi. „Helzt til satt sagðirðu Eben Bónabben!“ mælti hann, „áhyggjur harmar og andvökur eru elskendanna hlutskipti. Guð varðveiti kóngsdótturina frá hinum skaðvænlegu áhrifum ástarinnar.“

Allar fregnir frá Tóledó sönnuðu sögu uglunnar. Allur borgarlýðurinn var utan við sig af áhyggju og kvíða. Var nú búið að flytja kóngsdóttur upp í hæsta hallarturninn og öruggir verðir settir við alla trjáganga. Kóngsdóttir var yfirkomin af þúnglyndi, sem enginn vissi, hvernig á stóð, vildi hún einskis neyta og dauðheyrðist við allri huggun. Höfðu hinir beztu lækna reynt við hana íþrótt sína og

ekkert orðið ágengt; var það haft fyrir satt, að hún væri orðin fyrir gjörningum og lét konungur gera heyrinkunnugt, að hver sem læknaði hana, skyldi fá dýrasta gimsteininn í gripahirzlu sinni. Þegar uglan heyrði auglýsingar þessarar getið, þáð sem hún húkti út í horni, rak hún upp stór augu og varð enn íbyggjari á svipinn enn hún átti að sér.

„Allah Akbar!“ sagði hún, „lánsmaður er sá, sem lækningin tekst, ef hann aðeins veit, hvað hann á að kjósa sér úr gripahirzlu konungs.“

„Hvað áttu við, æruverða ugla?“ mælti Ahmed.

„Heyr nú kóngsson!“ ansaði hún, „það, sem eg ætla að segja þér frá. Vær uglurnar erum miklir fróðleiksfuglar og gefnar fyrir að grúska í myrkrinu. Þegar eg hérna um nóttina var að flöggra kríngum hallirnar og turnana í Tóledó varð eg vör við fornfræðislegt uglufélag, sem heldur fundi sína í stórum turni hvelldum, þar sem gripir konungs eru geymdir. Voru þær að ræða um lögun, letur og myndir á gömlum gimsteinum, um gull og silfurker þau, er lágu unnvörpum í gripasafninu, hvernig þau hefðu verið löguð á hverju landi og á hverri öld, en það sem þær höfðu mestan áhuga á, voru nokkur helgra manna bein og verndargripir, sem verið hafa í gripasafninu frá tímum Rauðreks mikla Gauta konungs. Þar á meðal voru sandalsviðar öskjur með stálgjörð utanum, er smíðuð var í Austurheimi og grafið á töfraletur, sem engir kunna að lesa, nema fáeinir fjölvitringar. Hafði félagið verið að ræða um öskjur þessar og áskript þeirra í lángan tíma og höfðu blotizt af því miklar orðadeilur. Þegar eg kom til, sat afgangur uglu, nýkomin frá Egyptalandi á öskjulokinu og leiddi hún rök að því, að í öskjunum væri geymd ábreiðan af háseti Salómons konungs hins spaka; kvað hún engan vafa vera á því, að hún hefði horizt

til Tóledóborgar með Gyðingum, sem flýðu þángað eptir að Jórsalaborg var lögð í eyði.“

Kóngsson sat nokkra stund hugsandi eptir að uglaan hafði flutt þessa fornfræðislegu ræðu til enda. Tók hann þrínæst þannig til máls: „Eg heyrði spekinginn Eben Bónabben segja frá hinni undarlegu náttúru verndargrips þessa, sem hvarf þegar Jórsalaborg var unnin og allir hugðu glataðan. Þetta er sjálfsagt hulinn leyndardómur öllum kristnum mönnum í Tóledó. Festi eg hendur á ábreiðunni, þá get eg hrósað henni.“

Daginn eptir fór kóngsson úr hinum skrautlegu klæðum sínum og bjó sig viðhafnarlaust líkt og tíðkast með Aröbum þeim, er búa á eyðimörkum. Hann litadi sig mógulan í framan og mundi engum detta í hug, að þar væri kominn hinn glæsilegi hermaður, sem vakti svo mikla undrun og ótta við burtreiðina. Lagði hann á stað til Tóledóborgar með staf í hönd og skreppu við hlið, og hafði á sér litla hjárðsveins pípu, gekk hann svo fyrir hlið konúngshallarinnar og bauðst til að lækna kóngsdóttur móti þeim verðlaunum, sem heitið var. Lá við sjálft, að varðmenn rækju hann burt með barsmíði. „Hvað ætli þú getir,“ sögðu þeir, „flökkudrengur frá Arabíu, þarsem hinir lærðustu menn hér á landi hafa orðið að gánga frá?“ Konúngur heyrði háreysti þeirra og skipaði þeim að leiða hinn arabíska mann á sinn fund.

„Þú voldugi konúngur!“ mælti Ahmed „eg er Bedúini frá Arabíu og hef alið meiri hlut æfi minnar í einveru úti á eyðimörkum. Þessir eyðistaðir eru, sem alkunnugt er, hæli djöfla og illra anda, sem æra okkur veslíngs smálana, þegar við vökum einmana, skjótast þeir opt inni hjárðirnar og trylla þær; gera þeir enda úlfaldana óða, sem eru hinar mestu spektar skepnur. Saungur og hljóðfæralist er hið bezla

rád við meini þessu og kunnum við lög, sem gengið hafa mann frá manni, og þau leikum við og sýngjum til að fæla hina illu anda á burt. Þessi gáfa er mér ættgeng og hún er mér veitt svo sem mest má verða. — Sé nú dóttir þín haldin nokkru slíku meini, þá býðst eg til að gera hana alheila af því, og legg eg höfuð mitt að vèði.“

Konúngur var vitur maður og vissi að Arabar eiga marga undarlega leyndardóma í vitum sínum og varð hann vongladur, er hann heyrði kóngsson tala með slíku sjálfs-trausti. Fylgdi hann honum undireins upp í turninn; voru á honum margar dyr og var herbergi kóngsdóttur efzt uppi í honum. Gluggarnir vissu út að grasbekk einum og lukt grindum utanum, mátti þaðan sjá yfir Tóledóborg og allar sveitirnar í kring. Fyrir gluggunum hengu dökkleit tjöld, því kóngsdóttirin lá þar inni yfirkomin af geðveiki og vildi engri huggun sinna.

Kóngsson settist á grasbekkinu og lék ýms arabísk lög á hljóðpípu sína; hafði hann lært þau af þjónum sínum í höllinni Generalife í Granada. Gaf kóngsdóttirin sig ekki að því, og lækarnir, sem við voru, hristu höfuðin og glottu með fyrirlitningar og tortryggnis svip; loksins lagði kóngsson frá sér hljóðpípuna og saung með einföldu lagi ástarvisurnar, sem staðið höfðu í bréfinu, er hann fyrst sendi kóngsdóttur til að birta henni elsku sína.

Kóngsdóttirin kannaðist við visurnar og færðist þá lifandi fögnuður um hjarta hennar; hún lypti upp höfði sínu og hlýddi á saunginn, — henni vöknadi um augu og hrundu fögur tárin eptir kinnnum hennar, en brjóstin gengu upp og niður af gedshræringu. Var þá rétt komið að henni að biðjast þess, að saungmaðurinn yrði leiddur inn til hennar, en meýjarleg blygðun aþraði henni. Konúngur sá, hvað henni bjó í huga og var Ahmed eptir hans boði leiddur inn. Vöruðust þau

Ahmed og kóngsdóttir að koma upp um sig; þau litu aðeins hvert til annars, en það augnarád var hverri orðgnótt auðugra. Aldrei hefir saunglistin unnið glæsilegri sigur en þenna. Nú var aptur kominn rósaltur á vanga kóngsdótturinnar, varirnar voru blómlegar og augun, sem fyrr voru orðin döpur, tindruðu nú af ljóma ástarinnar.

Læknarnir gláptu forviða hver á annan, en konungur horfði til Ahmeds með lotnínagarfullri undrun. „Þú frábæri úngi maður!“ mælti hann „bèðanaf skalt þú vera æðsti hirðlæknir minn og skal saunglistin þín vera læknisdómur minn. Taktu nú fyrst um sinn við verðlaunum þínum, og kjóstu dýrasta gimsteininn úr gripahirzlu minni.“

„Konungur!“ mælti Ahmed, „eg skeyti ekki um gull, silfur né dýrmæta steina. Þú átt einn helgan dóm í hirzlu þinni, sem kominn er frá Serkjum þeim, er fyrrmeir ríktu í Tóledóborg, það eru sandalsviðaröskjur og er í þeim silkiábreyða, — fá mér öskjurnar og þá er eg ánægður.“

Allir, sem viðstaddir voru, urðu hissa á því, hvað hinn arabiski maður beiddist litils, og furðuðu þeir sig enn meira þegar sandalsviðar öskjurnar voru bornar inn og ábreiðan tekin upp úr þeim. Hún var úr grænu silki smáofnu og alþakin ebresku og kaldeisku lettri. Hirðlæknarnir stungu saman nefjum, yptu öxlum og hlóu að einfeldni þessa nýja læknis, sem lét sér lynda svo lélega borgun.

„Þessi ábreiða,“ mælti kóngsson, „var fyrrmeir lögð yfir há sæti Salómons hins spaka; það sæmir vel að leggja hana fram fyrir sætur hinnar segurstu meyjar.“

Að svo mæltu breiddi hann áklæðið út á grasreitinn fyrir neðan legubekkin, sem hafði verið borinn út handa kóngsdótturinni; þvínæst settist hann niður við sætur hennar og mælti:

„Hver fær við því spornað, sem ritað er í bók forlaganna?

Spásögum stjörnuvitringanna er framgengt orðið. Vita skalt þú konungur! að við dóttir þín höfum lengi elskað á laun. Eg er „pílagrímur ástarinnar.“

Óðara en hann hafði mælt þetta, tókst ábreiðan á lopt og sveif burt með kóngsson og kóngsdóttur. Konungurinn og læknarnir mændu á eptir þeim gapandi og glápandi, þangaðtil ekki sázt nema einsog dökkleitur dill, þarsem þau bar við hjartleitt ský og hurfu þau samstundis út í bláan himingeiminn.

Konungurinn varð hamslaus og kallaði á gripavörðinn. „Hverju gegnir slíkt?“ sagði hann, „því helirðu fengið hundheiðnum manningum slíkan verndargrip í hendur?“

„Æ, herra!“ svaraði hann, „við þekktum ekki náttúru ábreiðunnar og gátum ekki lesið letrið á öskjunum. En hafi það verið ábreiðan af háseti Salómons hins spaka, þá er það vist, að henni fylgir mikil náttúra og getur hún borið eiganda sinn úr einum stað í annan yfir láð og lög.“

Nú dró konungur að sér óvigan her og hélt til Granada til að elta Ahmed og dóttur sína. Sóktist honum leiðin seint og illa. Hann setti tjöld sín á sléttlendinu og sendi kallara til að heimta aptur dóttur sína. Kom konungur sjálfur til móts við hann með alla hirð sína, en konungurinn var arabíski saungmaðurinn, því Ahmed var seztur að völdum eptir föður sinn andaðan og Aðalgunna hin fagra var drottningin hans.


Kristni konungurinn var fús til sátta, er hann varð þess áskynja, að dóttir hans fékk að halda trú sinni; gekk honum þó ekki guðhræðsla til, en konungar eru jafnan tiltektasamir og reglufastir í trúarefnum. Nú gekk ekki á blóðugum bardögum, heldur hátíðum og gleðiveizlum, en að því búnu sneri konungur heim aptur til Tóledóborgar og undi vel

ferð sinni; en úngu hjónin ríktu viturlega og farsællega í Alhambra.

Þess ber að geta, að þau uglan og páfagaukurinn höfðu fylgt kóngssyninum til Granada í hægum áfaungum; uglan ferðaðist ávallt um nætur og tefði við, þarsem ættingjar hennar áttu óðöl, en páfagaukurinn spjátraði sig á gleðifundum heldra fólks í hverri borg, sem lá í vegi hans.

Ahmed launaði þeim þakklátlega allan þann greiða, sem þau höfðu gert honum á pílagrímsferðinni. Ugluna gerði hann að æðsta ráðgjafa sínum, en páfagaukinn að hirðsiðameistara. Má því nærri geta, að aldrei hefir nokkru ríki verið betur stjórnað eða hirðsiðanna betur gætt en þar var.





Lbs - Íslandssafn



1001994248

